

Communicaziun a las medias dals 31 da fanadur 2025 (**Communicaziun ad hoc tenor l'art. 53 RQ**)

## La BCG sin buna via: il resultat semestril conferma las spetgas

La Banca Chantunala Grischuna (BCG) concluda l'emprim semester 2025 cun in gudogn dal concern da 116.1 milliuns francs. Il resultat da fatschenta importa 118.8 milliuns francs. Il volumen da las ipotecas è creschì sin 22.0 milliardas francs. La quota CET-1 correspunda a 19.4 pertschient. Il resultat semestril conferma la perspectiva per l'onn da gestiun 2025 che quinta cun in gudogn dal concern da tranter 210 e 230 milliuns francs.

### Las cifras distinctivas

- gudogn dal concern: CHF 116.1 miu. / –13.1%
- resultat da fatschenta: CHF 118.8 miu. / –10.6%
- emprests a la clientella: CHF +314.3 miu. / +1.3%
- afflussiun netta da novs daners: CHF –412.7 miu. / perioda precedent: CHF –203.6 miu.
- relaziun da custs e d'entradas II (incl. amortisaziuns): 51.0%

### In gudogn dal concern da 116.1 milliuns francs

En in ambient pretensius è il gudogn dal concern cun CHF 116.1 miu. durant l'emprim semester 2025 pli bass ch'il gudogn da la perioda precedent (–13.1%). Il resultat da fatschenta è sa reduci per CHF 14.0 miu. (–10.6%) sin CHF 118.8 miu. Ils motivs èn in augment dals custs da fatschenta e rectificaziuns da la valur pli autas.

### Il volumen da las ipotecas è creschì sin 22.0 milliardas francs

Cun in augment moderà da CHF 398.0 miu. (+1.8%) importan las pretensiuns ipotecaras la fin da zercladur 2025 CHF 22.0 mia. Var 70% da la creschientscha ipotecara deriva dal Grischun e rinforza la part dal martgà da la BCG en ses chantun d'origin. Tant ils emprests a la clientella cun CHF 25.0 mia. (+1.3%) sco era la facultad da la clientella cun CHF 51.9 mia. (+0.9%) èn s'augmentads ed han laschà crescer il volumen da fatschenta sin CHF 76.9 mia. u per CHF 789.0 miu. (+1.0%). La sedia principala ha registrà ina creschientscha positiva da CHF 637.4 miu. (+1.8%) da l'afflussiun netta da novs daners en tut ils segments. Sin nivel dal concern correspunda l'afflussiun netta da novs daners a CHF –412.7 miu.

### **In retgav operativ da 257.4 milliuns francs**

Il retgav brut resta cun CHF 267.7 miu. (+0.1%) sin il nivel da la perioda da l'onn precedent. Il resultat brut da la fatschenta da tschains ha pudì vegnir augmentà levamain durant l'emprim semester 2025 sin CHF 168.6 miu. (+1.0%). Il resultat net da la fatschenta da tschains è sa reduci sin CHF 158.3 miu. (−5.3%) cun furmar rectificaziuns da la valur da CHF 10.3 miu. Il resultat da la fatschenta da cumissiuns e da servetschs è sa sminuì per CHF 1.0 miu. sin CHF 83.7 miu. (−1.2%), quai ch'è d'attribuir ad in effect unic. Il resultat da la fatschenta commerciala è restà stabil cun CHF 10.4 miu. (+0.3%). Da quai è resultà in retgav operativ da CHF 257.4 miu. (−3.8%).

### **Ina relaziun da custs e d'entradas II da 51.0 pertschient**

Cun 51.0% resta la relaziun da custs e d'entradas II (inclus amortisaziuns) sut la valur maximala strategica da 55.0%. Ils custs da fatschenta èn s'augmentads per 5.3% u CHF 6.5 miu. Il motiv per questa creschientscha èn custs da persunal pli auts (CHF +4.9 miu.) pervi d'in augment da las personas employadas ed expensas supplementaras per il svilup da la banca.

### **Cun 19.4 pertschient ina meglra quota CET-1**

Cun in agen chapital imputabel da CHF 2.8 mia., rectificaziuns da la valur e remessas da CHF 400 miu. per ristgas da sperdita inerentas ed ulteriuras rectificaziuns da la valur e remessas da CHF 54 miu. dispona la BCG d'ina substantza da totalmain CHF 3.3 mia. per cas da ristgas. La quota CET-1 è sa meglierada sin 19.4% cumpareglià cun la fin dal 2024 (18.8%), tranter auter grazia a la realisaziun da la refurma Basilea III.

### **Confermà il gudogn dal concern prognostitgà per il 2025**

La situaziun economica actuala en cumbinaziun cun ils martgads da finanzas volatils è caracterisada d'intschertezzas. La BCG conferma er en quest ambient la perspectiva finanziaria prognostitgada per l'onn da fatschenta 2025 e quinta cun in gudogn dal concern da tranter CHF 210 miu. e CHF 230 miu.

### **Ines Pöschel banduna il cussegl da banca la fin da mars 2026**

La cussegliera da banca Ines Pöschel vegn a bandunar il gremi suenter la scadenza da sia segunda perioda d'uffizi la fin da mars 2026. Suenter in'activad engaschada durant otg onns è ella sa decidida da betg pli sa metter a disposiziun per ina terza perioda d'uffizi da quatter onns.

La Regenza grischuna ha elegì Ines Pöschel l'onn 2018 en il cussegl da banca. Dapi lura è ella medemamain stada commembra dal comité strategic ed ha contribuì cun sia expertisa e ses engaschi essenzialmain a l'orientaziun ed al svilup strategic da la banca. Il chantun Grischun vegn a publicgar la sedia vacanta en il decurs dal proxim temp.

Bernhard Kobel, [bernhard.kobel@gkb.ch](mailto:bernhard.kobel@gkb.ch), telefon +41 81 256 88 01

Banca Chantunala Grischuna, chascha postala, 7001 Cuir | [medien@gkb.ch](mailto:medien@gkb.ch) / [gkb.ch/medien](http://gkb.ch/medien)

La Banca Chantunala Grischuna porscha tut quai ch'i dovra per ina banca universal moderna – per persunas privatas, l'economia ed il maun public. L'interpresa cun sedia principal a Cuira è represchentada en passa 40 lieus en il Grischun. Cun var 1'000 collavuraturas e collavuratur è la BCG ina da las pli grondas patrunas en il chantun. Sia attaschadadad al Grischun exprima ella en moda multifara. Ultra da sias activitads economicas s'engascha ella era cun ses sponsoring, ses fonds d'engaschament, sia collecziun d'art e sia lavur voluntara.

**Termins:**

Quint annual 2025:                      février 2026

|                                                     |                |
|-----------------------------------------------------|----------------|
| Radunanza da las participantas e dals participants: | 9 da matg 2026 |
|-----------------------------------------------------|----------------|